



Selasa, 09 April 2024
Ogen: Habakuk 1:5-11



"Perbahanen Tuhan Si Rejin"



Tuhan si sembah kita e me Tuhan si mbisa. KinimbisanNa teridah i belang-belang doni arah kerina dampar. Manusia ngidah ras nggejapken maka Ia ngenca Tuhan si mada kegeluhen. Salah sada cara Tuhan encidahken kinimbisanNa kempak bangsaNa e me alu mpekeke bangsa Babilon bangsa si merawa dengen la banci kem. Cara Tuhan enda ilakokenNa gelah bangsa Israel ngidah pendahin ras kuasa Tuhan dengen mulih kempak Dibata. Kidekah enda bangsa Israel nggeluh erbana-bana. Cara Tuhan mabai bangsaNa gelah mulih dengen jera arah perbahanen si la mehuli e me alu ngendesken bangsa e kempak bangsa Babilon si merawa. Kitab Habakuk ngandingken bangsa si merawa e alu nuratken maka bangsa e niari dengen naluken bangsa si lit i sekelewetna, kudana pedasen kiam asa arimo, rawan asa serigala, desken rajawali nangkis panganna jenari si ngersaksa rehen i negeri-negeri si ndauh nari, tentera reh engkuasai alu gegehna jenari la lit benteng si banci ngambatisa. Bage me Habakuk nggambarkan perbahanen Dibata si Rejin alu make bangsa Babilon guna mpersingeti bangsaNa. Perbahanen Tuhan si Rejin, e me tema paksa tenengta wari enda. Tema enda tentuna jadi perenungen man banta gelah kita tetap ngidah maka Tuhan e Rejin. Kerejinen Tuhan i tengah-tengah geluhta icidahkenNa alu erbage-bage cara, banci arah keriahen bagepe arah kecedan ate. Situhuna sura-suraNa gelah kita tetap i bas tan keleng ateNa. Contoh kerejinen Tuhan si idah paksa gundari enda e me alu erbahan erbage-bage kejadiin alam (gempa bumi, tanah longsong, banjir, letusen gunung merapi ras sidebanna). Kejadiin-kejadiin alam enda i jadikan gelah kita selaku bangsaNa tetap nggeluh bagi si ngena ate Tuhan. Kejadiin entah pe bencana alam lit labo gelah manusia kernep tapi gelah bangsa manusia tetap mperdiateken undang-undang Tuhan. Kai pe banci ipake Tuhan nuduhkan kinimbisanNa, si enda ibahanna gelah kita tek man baNa.